

WIEN UN DEE BIBOL:  
CHRISTUNTUUM AA SCANLONSHA FALA  
Bootshofft 5

ENNLEIDUNG: (Fu woo disu Wiad uut too shraekjun see daut 'Uutshpraekjungs Blaut'. For pronunciation see the 'Uutshpraekjungs Blaut'.

Wien unn dee Bibol, waut fonn Teema ess ditt! Jissturn wort dee Fraug jushtallt, "Wooaromm ess daut needich too weetun daut daut jeit Wiendruuwun Sauft opp too buwoarun? Nuu mucht jie fraugun, "Wooromm ess daut needich too weetun daut dee Wiad 'Freid' unn 'Wien' fal toop jubrukkt woarun? Wann jie sullun too dam schluss komun waut ekj sie too jukomun, wann jie woarun mett aundru radon, unn jie disu Sachun nich fushton' woa jie dee nich kjenn Auntuuat jawun, unn dann mucht jie saijun, "Dee wisst nich fonn waut deer ad." Fonn daugol woa wie auffangun fonn wessu Shreffft shtada too radon. Wann wie dee nich kjenn buauntwuuatun, dann ess diss gloowun enn trubol.

ENN dee faaju Bootshofft fusocht wie oppwiess too jawun daut onjujaada Wiendruuwun Sauft jingk too hoolun opp een langut shtoot. Ekj jleew dee oppwiess jeit nich too fushtriedun wann eena opprechlich blifft. Oba, nuu mucht waa saijun, "Na, daut ess aula fein unn goot, ova woo soo ess daut dann, daut dee Wien enn dee Bible dam Mench maekt goot shparun, soo daut dam daut sheen jeit?" Secha ess daut nu goodu Fraug. Wie mujgun auss een Taixt fu disu Fraug Rechta 9:13 namun. Enn dam taixt radt dee Wienrangk unn dee saicht soo, "Sull ekj mien nia Wien fulotun, waut beidus Mench unn Gott froo maekt?" Opp Huach Dietch saicht daut, "...soll ich meinen Most lassen, der Getter und Menchun freilich macht...?" Soo senn doa noch meeja Shreffft shtada. Daut ess diss Teema waut wie nuu opp namun. Unn dee Fraug mucht komun, "Duu mengst too saijun daut diss Wien waut eenum maekt goot shparun ooda eenum freilich maekt ess Wien waut nich budiesolt?" Yo, daut ess waut ekj meng too saijun.

2. Dee tweeda faashlach

Nuu ekj jeef jisstern dam iashtun faashlacht daut wann eena junuuach Alcohol dringkt, dann woat eena shafftich doa derch. Oba wann eena shafftich woat fonn ditt, dann ess eena ol un bessju duun.

Tweedunss ekj jaw dam faashlach daut soo auss doa twee sortun Wien senn enn dee Bibol, soo senn doa twee sortun freid. Soo jaw ekj faa, iasthunss daut doa ess dee freid waut doa aunjushtiat ess derch Alcohol, ooda drugs.

a. Aunjushtiade freelichkjeit derch jujaadut dringktich

Daut ess kjeen juheemniss daut Alcohol Menchun shafftich meakjun kaun. Oba waut fonn'u freid ess daut? Ess daut unn woarhaufja sheen gon'? Fonn daugolshun Dach fushto wie daut Alcohol unn drug ess. Unn, unn Drug ess arjunwaut waut eenum dam Senn fushtiat.

Ekj neem wessut informatsjon fonn dam Internet. Dee eena beshreef fonn 'Alcohol Addiction', daut ess wann Mench nich looss kaun fonn Alcohol. Unn dee saicht, "Alcohol, mett waut ekj enn nam Beeja, Wien, unn hoadut Shnaups senn dee drugs waut daut miashtu jubrukt woarun. Alcohol ess dee drug waut jungu Menchun daut miashtu prowun. Alcohol ess unn drug waut meis jieda eena jrod soo kjrie'un kaun."

Nuu, woo shauft diss drug? Noch eena fonn Internet saicht daut diss drug ess, waut wie opp Engosh siajun, unn 'tranquilizer'. Daut ess soon drug waut eenum ruuich maekt. Disa saich wieda daut Benna Minuutun fonn unn dringk habbun ess diss Drug buttum Braijun. Unn dann buteibt dee dam Braijun unn maekt sikj aullus seeja goot shparun."

Ditt kje wie liarun fonn dee Bibol. Enn 1 Saumjul 25:36 laz wie, "Dann jingk Abigail no Nabal, unn doa wia hee unn hillt een Fasst enn sien Huuss, soo auss een Fasst fu een Kjenik. Unn Nabal sien Hoat wia froo enn amm, dann hee wia seeja duun. Doarumm zad see amm nusht, weinich ooda fal, bott dam morjun licht." Nuu, 25:3 liat onns daut Nabal nich em' juweenoljun unn frooa Mench wia. Oba, mett Alcohol wort hee seeja froo.

Nuu Gott hafft Maun soo jushauft daut dee nich leich waut onsenrich deit waut am mucht lota leet doon. Oba Alcohol buteibt Mench soo daut unn juwitsta fonn sikj selfst unn Noa maekt. Soona fangt aun frintlich too woarun, oba enn dam woat daut buteibt waut amm wuud hoolun fonn fonju dingja doon. Dann wieda, wann Mench iasht soo ess, fangt dee fleeshuss losst aun too werkjun, unn dann jeft daut Sind. Ekj fraug, hiat sick ditt no soont waut Gott jufelt?

Ekj hab musst fal shtudiarn disu sach too fushton' oba hab bott nuu noch nich juliat arjunt waut goodut waut uut Alcohol kjempt. Aun dee aundru sied hab ekj juliat woo goot Wiendruuwun senn fu dam Kjarpa.

Fonn aul ditt kje wie dann fushton woo diss Drug eenum aum aunfangk maekt goot shparun, auss wann aullus goot ess, unn woo eenum daut too shlop bringt waut eenum hellt fonn shlaichtu dingja doon, unn woo unn Maun dann shafftich woat. Oba, ess ditt werkolju freid? Ooda hab wie onns lotun faa lajun derch unn Drug? Onns Braejun jefft onns nich meeja unn woarut Billt. Dee Braejun ess daut poat emm Kjarpa. Dee Senn ess daut Jeistoljut poat waut dam Braejun brukkt soo lang aus wien hia lawun. Dee licht onns faa unn saicht aulus ess seeja fein, oba daut mucht gonich senn.

Doa shauft mol een fu mien Foda enn onnsu Saujmal. Diss Maun heet Jep Eelichs. Unn dann een Dach fu oojlekt amm daut enn sienu oabeit woa hee shauft. Twee 2x4 bieta Hollt 8 shoo langk troffun amm. Eena enn'u Hoft unn dee aundra aum Kopp. Hingun opp een Truk wort amm uutum Woolt jufiat, opp unn seeja roffa Waich unn dann auff no'm Docta. Fu Daugol hungk sien lawun soo aus aun een Twiarum. Unn dee waut amm no aun wiaron dee drungkun bott ann daut nich meeja soo shlaicht jingk. Fal habun dee judrungkun. Dann wann dee jefft unn drug uutum Kjarpa

trokk, musstun see wada dringkjun. Wann see iasht junuuach judrungkun haudun dann luuah aa Braejun too ann unn sad, "Daut ess gonich soo shlemm." Unn wann daut iasht auf jutrokkun haud dann wordun see enn, daut wia oba soo shlemm.

Uut aul ditt lia wie daut dee Freid waut diss Drug jefft ess nich woara Freid. Oba doa ess noch eenu sort Freid, unn dee well wie nuu no seen'. Ditt ess nu Freid waut dee werkolju freid ess. Diesu Freid ess aunjushtiat derch goodut.

b. Aunjushtiada freid derch goodut

Dann ess doa dee Freid waut aunjushtiat ess derch daut waut woarhauftich ess. Patton saicht enn sien Buuak, "Doa ess nu framdu Endrukk, kraikt nuu enn onns Dach, daut nusht kaun freid bringun buuta Alcohol dringtich." Oba dann shleit hee Psalm 4:7 faa. Hia saicht daut, "Duu hasst meeja Freid enn mien Hoat judon', meeja auss enn janu enn aaru Jutreid unn Wien Arnt." Nuu daut Wuuat 'Freid' hia ess daut namoljut Wuuat waut wie enn Rechta 9:13 fungun.

Nuu, daut ess meiss nich maejlich soonu Farsht too lasun on daut wie doa nenn lasun doon' daut ditt mott fonn Alcohol komun. Oba, radt ditt fonn jujaada Wien? Daut Wuuat 'Wien' enn Rechta 9:13 ess nich 'Jajin'. Daut ess 'Tirosh' waut fonn Frucht radt. Dee Nia KJV opp Engolsh awasatt ditt auss 'nia Wien'. Nuu, beiduss Wiendruuwun, daut Frucht, ooda dee fresha Sauft kjenn Mench nich duun maekun, doch saicht daut dissu beid jawun beiduss Gott unn Mench freid!

Tweedunss, daut Wuuat waut awasatt ess auss 'Freid' ess daut Heebraishut Wuuat 'samech'. Ditt Wuuat woat 152 mol jubrukkt enn dee oolu Shrefft. Ditt Wuuat radt fonn 'freijun' ooda 'shafftich' senn'. Unn enn disu shtad radt daut fonn froo senn on daut doa Alcohol enn dam dringk ess. Ditt ess soonu freid

auss daut jefft wann dee Arnt jrots benn  
ess. Wann dee Wiendruuwun Arnt derch wia  
ooda dee Jutraid Arnt, dann wia Maun foll  
freid. Daut ess fonn waut disu freid kjempt.  
Disu Freid kjempt nich fonn Alcohol; oba ess  
werkjlich, ennalich, woarhauftich!

Unn, wieda, nempt daut Alcohol Gott froo too  
maekjun? Secha nich! Waut ess daut dann waut  
Gott froo maekjt? Wann dee Mench deit waut  
hee saul; wann dee Engoln doon waut see  
sellun, wann dee Wiedruuwun Boom deit waut  
dee saul, daut ess waut Gott freijun deit!  
Unn woo maekt daut dam Mench shafftich?  
Onjujaada Wiendruuwun Sauft ess goot fu dee  
Jusundtheit, fu daut Hoat unn daut Bloot!  
ENN Iesreel wort doa jushraajun mett Freid  
wann see aunfongun dee Wiendruuwun too  
traumplun unn dee Sauft wia noch nich mol  
foadich.

Nuu fraug ekj, ess doa oppwiess daut  
onjujaada Wiendruuwun Sauft Maun shafftich  
muuak too Bibol Tiet? Ess doa soont  
bushrawun? Dee Juudisha Shriewa, Josephus,  
waut doa korts no Jesus sienu Tiet  
jushrawun hafft radt doa fonn aus hee fonn  
Joosopp, e'm oolut Tastement shrifft. Hee  
shrifft soo fonn dam Kjenik sien Kuffol  
Drauga sien droom, "Hee sad doaderch daut  
enn sien Droom sach hee dree Pingols  
Wiendruuwun aun dree Wienrangkun Assta  
hengun, groot unn reed too'm plekjun; unn  
daut hee dee uutjudrekt haud enn dam Kjennik  
sien Kuffol waut enn sienu Haundt wia, unn  
daut Wien doanenn jusraft haud, jeef hee dam  
Kjennik too dringkun, unn dee neem daut fonn  
amm unn sien aunjusecht wia shafftich."

Lota shrifft Josephus daut Joosopp hafft  
jusaicht too dam Kuffol Draugja waajun dam  
Wien, "...dann hee (Joosopp) leet amm (Dam  
Kuffol Draugja) weetun daut Gott shengkt dee  
Frucht fonn dee Wienrangk opp Maun fu goot,  
unn dee Wien woat jugotun fu amm unn een  
fushpraakjun truu too senn eena too dam  
aundrun, unn maekt een eng too aa jushtried,

unn nempt deeput Juffeel unn Trua uut dam  
Senn fonn dee waut daut brukkun (dringkun)  
unn maekt ann shafftich." Nuu, hee radt hia  
fonn dam Wien waut fresh fonn dee Wiendruwun  
woat emm Kuffol judrekt.

Psalm 104:14-15 radt fonn woo Gott dam  
Raejun latt komun soo daut dee Iad Frucht  
kaun draugjun unn maekt daut Grauss waussun  
fu daut Fee unn jefft Maun Sot daut hee dee  
Iad buoabeidt unn Broot arnt unn Wien, waut  
daut Hoat froo maekt, unn Eelj wuaderch daut  
Jusecht shmock woat, unn Broot daut Maun  
daut Hoat shtoak woat.

Adam Clarke shrifft soo fonn disu Farsh:  
"Unn bessju Wien hafft nu wundasheenu waich  
dam Mench opptooheiturn unn fresh Moot  
jawun." Nuu wie mugjun jleewun daut hee fonn  
jujaadun Wien radt. Oba hee radt fonn daut  
waut nich jujaet hafft dann hee saicht  
wieda, "Alcohol maekt losstich, oba daut  
randt Maun uut aun Krauft; unn jieda dringk  
latt Maun oija auf. Aichta Wien (Wien waut  
nich jujaet hafft) maekt Maun losstich unn  
shtoakj, unn maekt amm froo, unn halpt daut  
dee shafftich blifft derchum dee Muscoln  
shtoakja maekjun, unn dee Narfun  
unjashtetun. Ditt ess daut raichtu jubrukk  
fonn Wien."

Soo hab wie dann juseen fonn aundru waut  
sikj disu Sach jushtudiat habun, daut  
shafftich senn fonn Wiendruwun Sauft  
dringkjun nich waut niat ess to dee Shreffft.  
Ditt ess ukk un shafftich senn waut Maun  
nich leet woat. Wann Maun Alcohol judrengk  
dringkt butt dee too fal hafft, daut deit  
dam seeja fal mols leet unn ess nienich fu  
dam Kjarpa goot. Daut goots waut doa enn  
jujaadun Wiendruwun Sauft ess, ess noch bata  
enn dam on jujaadun Sauft.

Nuu, doa woarun soonu senn dee woarun  
saijun, "Ekj hab nu Fraug awa nu wessu  
ommshtentlichu Shreffft shtad." Doatoo well  
wie nuu awa gonn.

## VI. OMSHTENTLICHU SHREFFT SHTADA

### A. 3 Moosus 10:8-11

Wie fangun aun mett 3 Moosus 10:8-11. Disu Shreffft shtad saicht soo, "Dan rad dee Harr mett Moosus unn sad, 'Doot kjeen Wien ooda shtoakjut Judrengk dringkjun, nich duu, ooda dienu Sans mett die, wann duu en dam Fusaumlungszelt jeist, soo daut duu nich shtoafst. Daut ess eenu Ordning fu emma fu aul dienu Nokomundu, daut jie mujgun unjasheedun tweshun daut waut doa Heilich ess unn unheilich, unn daut waut rein un unrein ess, unn daut jie dee Issreelitushu Kjingja liarun aul disu Orgningjun waut dee Harr juradt hafft derch Moosus sienu Haunt."

Nuu, dee Shreffft Uutlaija senn sikj soo meeja eenich daut dee uasaak woo derch disu Ordning jujaft wort ess daut Aaron sienu Sans, Nadab un Abihu, enn daut iastu poat fonn ditt Kapitol haudun jusindicht doa derch daut see haudun too fal Alcohol juhaut too dringkjun auss see enn Gott sien Huus deendun. Unn doa derch jeef Gott, derch Moosus disun Bufal. Dee uuasaakj wooa derch see jusindicht haudun wia daut see haudun unn bat too fal Wien juhaut, unn doa derch kunnun see nich unjasheedun tweshun waut heilich un waut unheilich wia, un tweshun reinut unn unreinut.

Nuu well wie onns disum Taixt fonn twee siedun buseen. Iashtuns well wie daut soo namun daut dee Dringk fonn waut daut hia radt ess jujaedut Judrengk, unn tweeduns, soon Dringkj waut nich jujaut hafft.

#### 1. Jujaada Dringkj

Iashtuns dann, shtal wie onns daut soo faa daut Nadab unn Abihu senn falahauft juwasst doa derch daut see sikj unn bat budrungkun habbun auss see enn daut Gottus Huus deendun. Ditt hafft ann dam Senn fushtiat soo daut see nich kunn unjasheedun tweshun daut waut heilich wia unn daut waut nich heilich wia.

Hia fonn hab wie dann too liarun daut jujaedut Judrenk eenum kaun dam Senn fushtiarun, unn daut ess secha soo. Wann dee Priesta nich arlaubt wia

soont too dringkjun eeja hee deend, dann wuud hee tweshun rein un unrein unjasheedun kjenn. Fonn ditt kje wie dann ukk liarun daut wann die Priestar eenmol derch ess enn daut Fusaumlugkzelt, dann kaun dee wadda soont dringkjun waut am dam Senn fushtiarun kaun. Wieda, kje wie dann uut ditt ruut namun daut arjunt waa waut nich een Priestar ess, ess erlaubt too arjunt nu Tiet soon dringktich too dringkjun.

Fonn ditt kom wie butt disum schluss daut Gott daud een doont ess wann dee Priestar soont dringkt waut amm dam Senn soo fushtiarun kaun soo daud hee nich tweshun heilich unn unheilich unjasheedun kaun, ooda tweshun reinut unn unreinut, soo lang aus hee daud nich enn Gott sien Huus deit. Fonn ditt mutt wie daud bujo'un daud arjunt eena waut nich unn Priestar ess, mach ditt too arjunt nu Tiet doon'. Unn dee jufoa too fal too dringkjun wood noch hecha senn fu soonum waut nich een Priestar wia auss fu dam Priestar.

Ekj fraug nuu, kjan jie Gott soo aus ditt? Saicht diss selfstja Gott nich too aulum, "Siet jie heilich soo aus ekj heilich sie?" Saicht nich diss selfstja Gott daud onun heilich senn woat kjeena seelich woarun? Ekj fraug wieda, weet dee Gott waut aulus jumaekt hafft nich daud soon dringk shtoff Jefft unn Drugs ess? Ekj fraug, ess disum grootun heiljun Gott daud een doont wann eena sikj unn bat busipt, soo lang auss eena daud nich enn Gott sien Huss deit? Weet diss groota Gott nich daud wann Maun soonu frieheit hafft auss diss fusthentniss jefft, daud ditt woat fal Mort unn Sind jawun, unn fal Bufriedu lawus twee rietun? Weet diss Gott nich daud falu, dee disum Dringkj namun, woarun Kjingja too Welt bringun dee dam Senn soo fudorwun ess daud dee niemols woarun unn jusheidut lawun fiarun?

Woo needich ess daud dann nich daud wie onns soonun uutfaul budengkjun. Ekj dengk, wie mottun onns disum Taixt dam tweedun waich buseen.

## 2. Diss Taixt radt fonn Wien unn Frucht Sauft

Soo well wie dann nuu disum Taixt butrachtun aus wann dee Dringkj fonn waut daud hia radt nich

Alcohol hafft. Iashtuns, disu Shreffft shtad saicht nonich daut Nadab unn Abihu habun soo fal too dringkjun juhaut daut see duun wiarun. Daut hab wie onns soo faa jushtallt. Daut ess naturalich daut wie butt soon Shluss komun wuudun. Tweeduns, waut daut saicht ess daut see framdut fia junomun haudun. Nuu, bie dam Aultoa wia fia fonn wooa aul daut fia junomun wort waut enn daut Gottus deenst jubrukt wort. Ditt las wie enn 3 Moosus 6:12-13, unn 16:12.

Nuu well wie onns disum Taixt mol fonn dee aundru sied busseen. Lot onns daut nuu soo namun daut diss Wien fonn Wiendruuwun Sauft radt, unn daut shtoakje Jedrenk ess Sauft fonn arjunt Frucht waut nich Wiendruuwun sennt. Daut Wuuat enn dee Heebraishu Shreffft ess Shaykor, waut wie ol eeja juseen habun.

Nuu dee Fraug waut een jeidra woat habun fu mie ess, woo kaun daut halpun fu dam Priesta wann dee nich wuud onjujaedun Sauft dringjt toom unjasheedun tweshun heiljut unn unheiljut, unn reinut unn unreinut? Ditt ess nu Fraug waut wie ombudingt muttun Auntwuuat jawun eeja wie kjenn jleewun daut waut ekj onns faa jusatt hab raicht ess. Unn ekj jleew enn disu Fraug licht dee Shlatol to dee Ordning waut Gott hia jefft. Daut ess disu Fraug wooa wie daut awaju fonn onnsu Tiet too jawun wellun.

Wann wie Ovuntmol aufhoolun, waut bediedt daut kuffol, dee Wiendruuwun Sauft? Ess daut nich Jeesus sien Bloot? Unn budiedt daut nich Gott sien grausomma Oija jaejun dee Sind fonn daut gauntzu Menchheit? Unn ekj well hia saijun unn daut lota bwiesun, unn ekj jleew jie woarun doa dann mett enfustonn senn, daut dee Wien opp Ovuntmol wia emma on jujaeda Wiendruuwun Sauft.

Nuu well wie no wessu Shreffftstada gon toom wiesun daut dee Wiendruuwun uutraumpoln buwest enn dee Shreffft Gott sien grootun Oija awa Sind. Enn 1 Moosus 49:11 see wie daut dee Sauft fonn dee Wiendruuwun radt fonn bloot. Disu Shreffftshtad radt fonn Gott sien Saejun awa Juda. Unn daut saicht, "Hee bingjt sien Asel aun dee Wienrangk, un sien jungun Asel aun dee bastu Rank; hee wausht sienu

Kjleeda en Wien un sienun Rock enn Wiendruuwunsauft, soo aus Bloot." Waut ditt enn helt ess daut dee Weinrangkun enn Juda sien Laundt wuudun soo riev senn daut hee sienu Asuls wuud aun dee aun bingjun. Ditt wierun Plauntun waut seeja no opp jupausst wort. Niemols wuudun dee aaru Asuls aun dee aun bingjun, buta dee seeja riev wierun. Unn Wiendruuwun Sauft, wooa juweenlich soo jushpoat wort wuud riew junuach senn daut see daut kunn bruukun toom Kjleeda waushun. Oba hia see wie daut Wiendruuwun Sauft fujlikt wort mett Bloot. (Seet ukk 5 Mooses 32:14.)

Nuu, dee Barrun ooda daut Frucht uut traumpoln ess fujlikkt mett Gott sien Oija. Soo go wie dann nuu no Jesaija 36 (1-4). "Waa ess ditt waut fonn Edom kjempt, mett juforwnu Kjleeda fonn Bozrah, disa waut soo Herrlich ess enn sienu Kjleeda, waut reist enn sienu grootu Krauft? - Ekj, waut doa enn dee Juraichtichkjeit rad, ekj dee doa mechtich ess seelich too maekjun. Wooaromm senn dienu Kjeeda root, unn dien Rock soo auss eena waut Wiendruuwun traumpolt? Ekj hab dee Wiendruuwun Bett auleen jutraumpolt, unn fonn dee Menchun wia kjeena mett mie. Dann ekj hab dee jutraumpolt enn mien Oija, unn unjajuklungt enn mien Wutt. Dee aa Bloot ess aun mien Kjleeda jushpretst, unn habbun mien Rock fukliat. Dann dee Dach fonn mien Rach ess enn mien Hoat, unn daut Joa fonn mien Trigjukofftu ess jukomun."

Nuu disu Shrefftshtad profitsiat fonn nu Tiet waut nock too komun ess. Oba daut bilt ess kloa. Wiendruuwun Sauft ess unn Bilt fonn Bloot, unn dee traumpoln jeit toop mett Gott sien Oija. Ditt ess waut daut buwiest.

Nuu drie wie butt Opunboarunk 14 (Las 18-20): "Unn doa kjeem noch een Engol fonn dam Aultoa, waut doa krauft haud awa Fia, unn dee shraech mett nu luudu Shtemm no dam waa dee shoapu Sants haud unn sad, 'Haaw mett dee Sants, unn saumol dee pingols fonn dee Wienrangk fonn dee Iad toop, dann dee aaru Wiendruuwun senn gaunts riep.' Dan heiwed dee Engol dee Sants enn dee Iad, unn saumold dee rangkun fonn dee Iad toop, unn shmeet dee enn dee grootu Wienprass fonn Gott sien grootun Oija. Unn dee

Wienprass wort jutraumpolt buuta dee Shtaut, unn Bloot kjeem uut dee Wienprass butt dee Piad aa Jubett, 1600 Shtapwaaj langk." Nuu, daut Bilt waut daut hia jefft ess hia kloa.

Wie mottun noch eenu Shrefftshtad no seen (Opunboarunk 19:11-13). "Donn soch ekj dam Himmol opgon, unn seetumol, unn wittut Piat. Unn dee waut opp dam saut, dee doa junant woat, Tru unn Woahauftich; unn enn Juraichtichkjeit deit dee rechtun unn Kjrich maekun. Sienu Uugun senn soo auss nu Fiaflaum unn opp sien Kopp wiaron falu Kreen'. Unn hee haud een Nomun waut kjeena wisst auss hee selfst. Hee wia jukjleet met een Rock waut enn Bloot enn judukt wia, unn sien Nomun wia 'Daut Gottesswuut'. Unn dee Armeejun em' Himmol, jukjleet en feinut Leinzeich, witt unn rein, kjeemun amm hingaraun opp wittu Piad. Nuu, uut sien Muul jingk unn shoaput Shwiat, daut hee mett daut dee Felkja shlon' sull. Unn hee selfst, woat dee mett eenu Isashtang reijlun. Hee selfst traumpolt dee Wienprass fonn dam wuttjun unn oijalichun Aulmechtjun Gott."

Soo hab wie dann fonn dee Shrefft juseen daut daut Frucht traumpoln buwiesst Gott sien Oija, unn dee Wiendruuwun Sauft buwiesst Bloot. Nuu go wie dann trig no 3 Moosus 10. Enn dee iashtu Farsht habbun Nadab unn Abihu framdut Fia no'm Fusaumlungkzelt jubrocht. Enn dee tweedu Farsht kjempt Gott sien Fia unn fratt dee opp. Ditt ess Gott sien Oija. Dann wordun disu onjuhoorsommu Priesta oppjuriempt. Unn enn dee sasstu Farsht saicht Gott dann, "Doot nich juun Kopp aufdaikjun, unn riet nich juunu Kjleeda twee (Dee Juudun reetun juweenlich aaru Kjleeda zwei wann waut seeja shlaichtut wort). Gott saicht, doot daut nich soo daut jie nich shtoawun, unn Gott sien Oija nich awa juunt kjempt."

Nuu, waut hab wie too liarun fonn aul ditt? Dee Priessta sullun nush drinkjun waut uutjutraumpolt wia, wada Wiendruuwun Sauft ooda Sauft fonn arjunt aandrut Frucht. Dit wuud ann emma halpun aum dengk hoolun daut see aulus raich deedun soo daut Gott sien Oija nich awa ann kjeem, soo aus daut awa Nadab unn Abihu haud.

Oba doa ess noch meeja buwiess daut dee Wien enn onnsum Taixt nich jujaada Wien ess juwasst. Doa too dree wie no 4 Moosus 6 (las 1-4). "Dann sad dee Harr too Moosus, 'Rad too dee Kjingja Iessreel, unn saiij too ann, 'Wann nu Fruu ooda een Maun unn Opfa enn saiejunt unn Fushpraikt sikj hann too jawun unn uutuneen too sattun no dam Harrn auss een Nazara, dann saul hee sikj uk uutuneen sattun fonn Wien ooda stoikjut dringktich. Hee saul nich Adikj, waut fonn Wien jumaekt ess, ooda Adik waut fonn aarjunt soo waut ess, dringkjun; unn ukk nich aarjunt Wiendruwun Sauft dringkjun, ooda freshu Wiendruwun, ooda Rusien' atun. Aul dee Daugol waut hee uutuneen jusatt ess saul hee nusht atun waut fonn dee Wienrangk kjempt, fonn dee Kjienna butt dee Shall."

Hia see wie daut dee Jusatsun awa dam Nazara wierun noch shtrengja auss dee awa dam Priesta. Nuu seetumol waut dee Nazara aullus saul fonn waich bliewun. Iashtuns, Wien unn dam aajunlichun Dringk ooda soo aus em' Heebra'ashun, Jajin ooda Shaykawr, ooda soo aus ekj daut wuud awa sattun, "Wiendruwun Sauft ooda Sauft fonn arjunt aundrut Frucht." Hee saul ukk nich Adikj dringkun. Adikj wort fonn daut namuljut jumaekt. Unn dann noch saul dee Nazara nich freshu Wiendruwun ooda judraijdu Wiendruwun atun.

Dee fiadu Farsht tallt daut aula soo aus ditt toop, "Aul dee Daugol waut hee uutuneen jusatt ess saul hee nusht atun waut fonn dee Wienrangk kjempt; fonn dee Kjienna butt dee Shall." Nuu daut ess gaunts secha daut dee Nazara nich musst waich bliewun fonn freshu Wiendruwun ooda dee judraidu doawaijunts daut hee mucht doaderch budiesult ooda duun woarun. Dee Kjienna ooda dee Shall wuudun dam ukk nich duun maekjun. Hia fonn weet wie daut gaunts kloa daut daut Jusats, daut dee Nazara nich Wien dringjkun sull nich too doonun haud mett duun woarun.

Ekj much daut hia noch bie laijun daut dee Juudun brukten aulus fonn dee Wienrangk waut daut jeef wann dee Sauft muukun. Dee brukton dee Kjienna soo goot aus dee Shall. Dee fungun jubruk fu aulus. Dee wiaron mett dee Frucht fonn dee Weinrangk soo aus Menonitun senn met aa Shwien shlachtun. Doa woat jusaicht fonn dee Mennonitun daut wann dee Shwien

shlachtun dee brukten aulus buta nich daut jushrecht. Soo wia daut enn Iesreel mett dee Wiendruwun.

Dann fraug wie nuu, wooarumm sull dee Nazara waich bliewun fonn aul ditt? Wadda, daut wia nich doawaejunts daut dee doa fonn mucht duun woarun, dann dee miashtu fonn disu sachun kun'n dam Mench nich duun maekjun. Daut jeit nich duun too woarun aun dee Kjienna ooda dee Shall ooda freshu Wiendruwun ooda judraejdu. Waut ess dann dee uasaak woaderch see ditt nich sullun? Daut ess doa derch daut aul ditt too doonu haud mett waut beidus Wiendruwun ooda aundru frucht traumpoln budiedun deed, unn daut ess Gott sien Oija.

ENN 3 Moosus bushriffet daut fonn dee 7 Fasstun e'm Joa waut Gott uutjusatt haud fu Iesreel. Dee iashtu feeja, sennt daut Passafast, dann dee 7 daugol fonn daut Onjusuadut Broot, unn dann dee Fasst fonn dee iashtu Frucht. No disum Dach taldun see 50 Daugol unn dann fiadun see dam Waakjun Fasst. Nuu uut disu 4 Fasstun hool wie 3. Fonn disu iashtu 4 Fasstun jingun aulu 4 enn follfelling aus Jesus mol shtorf aum Kjriets unn trig reisd no'm Himmol. Aun dam Passafasst Dach shtorf Jeesus. Aun dam Dach fonn dee Iashtu Frucht shtunt hee opp fo'm dee Doodus unn lawd wadda. Dam Waakjunfasst nann wie Pingkstun. Nuu, aul disu 4 Daugol follun enn Iesreel aaru Jutraiud Arnt.

Donn, enn dee 7 Moonat haudun see noch 3 Fasstun. Au'm iashtun Dach haudun see dam Posaunun Fasst. Aun dam 10 Dach wia dee Fuseenungsdach. Ditt wia dee huach heilichsta Dach e'm Joa. Au'm 15 Dach haudun see dam Loofboodunfasst. Diss Fasst wia wada fu 7 Daugol. See muakun sikj Zeltun ooda arjunt soo waut unn wondun inn disu fu disu 7 Daugol. Ditt budiet aula waut wooa wie nich Tiet habun fonn too radun.

Oba, wooa ekj no uut sie ess daut fonn disu latstu 3 Daugol hool wie kjeenu. Woarom nich? Dee senn noch nich enn follfelling jugon'. Unn disu latstu dree Fasstun follun uk enn nu Arnt Tiet oba disu Arnt Tiet wia dee Wiendruwun Arnt Tiet. Dee iashtu 4 Fasstun follun enn dee Jutraaed Arnt Tiet. Ditt

buwiest daut Jeesus daut lawuns Broot wood woarun. Ditt ess waut daut Broot opp Owuntmol budiedt. Dee Wiendruwun Arnt budiedt daut Kuffol waut wie habun opp Owuntmol. Ditt buwiest dam Harrn sien Oija. Ditt radt fonn dee seeja dunkla Tiet waut noch far onns licht. Ditt buwiest dee Tiet wooa Gott sien Oija uut jitt awa dee gaantsu Welt. Ditt ess ukk waut Wiendruwun Sauft buwiest. Daut ess nich needich daut daut jujaada Wien ess. Aarjunt jutraumpoldu Sauft buwiest ditt, oba opoatlich dee Wiendruwun Sauft dan dee ess root.

Concl: Tu'm Shluss sai j ekj noch ditt. Dee Shrefft shtada waut wie buseen habun senn soonu waut onns leicht fuleidun kjenn unn doa opp hann wiesun daut daut Wuuat Wien emma fonn jujaada Wien radt. Wann dee Wien enn 3 Moosus jujaada Wien ess, dann kje wie fonn daut namun daut unn Priesta ooda soo goa nuu dee Pradja kjenn soo fal dringkun butt see nich meeja gaunts kloa senn, soo lang aus see daut nich doon' wann see em' deenst senn. Hia ku wie dann ukk ruut namun daut soonu waut nich e'm Deenst wiarun emma kunn' soo fal dringkun butt see nich meeja kloa wiarun. Oba soont wuud ju wie nienich wellun soo habun. Waut fonn Gott wuud dee Gott fonn dee Bibol dann senn? Ditt wuud onns bott doa bringun daut daut unn grootut jusuup jeef. Doamett mott wie ruum jawun daut doa mott nu aundru Meening senn' enn soonu Shrefft shtada auss wie buseen habun.

Oba, ekj jleew daut enn soonu Shrefft shtada auss wie buseen habun, budiedt dee Wiendruwun Sauft Gott sien oija. Ditt ess nich doa derch daut Maun duun maekjun kaun, oba doa derch daut dee Sauft jumaekt woat fo'm traumpoln. Ditt jutraumpol buwiest Gott sien Oija. Daut ess doa waajun daut dee Priesta soont nich dringkun sull wann dee e'm Deenst wia, unn uk nich dee Nazara. Doa derch daut see nich jutraumpolda Jedrenk dringkjun deedun eeja see enn Gott sien Huus shauftun musstun see aum dengk hoolun daut see doa benn ukk aulus raicht deedun, dann fu daut nich raicht doon kjeem Gott sien oija awa Nadab unn Abihu.

Morjun well wie noch wessu wichtju Shreffshtada no seen, unn eent fonn dee ess Juhaunus 2, wooa Jeesus hafft Wien jumaekt.